

## PAG-AMPO ALANG SA PINILIAY 2022

Pangulo: Mag-ampo kita arun ang taliabot nga piniliay, nasudnon ug lokal, tiunay nga maghulagway sa kabubut-on sa Ginoo, nga naga-gabay sa padulngan ug kaugmaon sa mga kanasuran. Sa matag pangamuyo, magdungan kita: LUWASA KAMI, GINOO.

Mga Tawo: *Luwasa kami, Ginoo.*

Sa mga pag-pugos, panghadlok, panghasi ug terorismo...

*Luwasa kami, Ginoo.*

Sa mga panikas, pamakak ug paghikaw sa kamatuoran...

*Luwasa kami, Ginoo.*

Sa mga panglingla, pangikik, ug pagsabotsabot arun mopatigbabaw ang kadaut ...

*Luwasa kami, Ginoo.*

Sa kasayon magpatunto ug sa kadali magpabuta sa panlantaw...

*Luwasa kami, Ginoo.*

Sa mga pagpanghulga ug sa mga mapintas ug mapalabilabihong mga pulong...

*Luwasa kami, Ginoo.*

Pangulo: Karun ang inyong tubag sa kada pangamuyo, **PAMATI-A KAMI, GINOO.**

Arun ang konsensya mao untay gamiton nga basihan o pasikaran diha sa pagpili.

Arun ang kaayohan sa kadaghanan pahimug-atan sa tanan.

Arun ang tawhanong dignidad tauron sa tanang panahon.

Arun ang mga kabus ug mga timawa unahon pagtagad sa katilingban.

Arun ang pag-atiman sa atong palibot ug nataran dili kalimtan.

Arun ang pagkahiusa mamahimong dalan sa kalinaw ug kauswagan.

Arun ang tinuod nga kahadlok sa Diyos ug gugma sa isigkatawo mamahimong sumbanan ug giya kanila nga naninguha pagserbisyo sa katawhan.

Mga Tawo: *Pamati-a kami, Ginoo.*

Pangulo: Mag-ampo kita. Magdungan:

Magbalantay sa mga kalag ug manluluwas sa mga nasud, ang politika imong gasa kanamo, usa nga pagsampit arun pag-alagad sa uban ug pagtubo sa kabalaan. Gabaye ang politika ning among nasud sama sa imong paggabay sa among kinabuhi. Kining among panginlabot sa politika alang sa mga botante ug mga kandidato maghimaya unta sa Imong mahal nga ngalan ug mopasikad sa paglambo sa among kabalaan, karun ug sa gihapon. Amen